



GOVERNUN KONSTITUSIONÁL BA DA-IV SEKRETARIA ESTADU KONSELLU MINISTRUS

KOMUNIKADU IMPRENSA

Sorumutu Konsellu Ministrus Loron 16 Dezembru 2010

Konsellu Ministru hala'o soru-mutu iha loron Kinta ne'e, loron 16 fulan Dezembru tinan 2010, iha Sala Soru-Mutu Konsellu Ministrus nian, iha Palásiu Governu, iha Díli, no halo aprovasaun ba:

1. Dekretu-Lei kona-ba pagamentu estraordináriu saláriu fulan ida nian ba setór públiku

Governu Konstitusionál hakarak konklui polítika kona-ba prezervasaun rekursu umanu nian ne'ebé iha ligasaun ho atividade Estadu Timór nian, tanba ne'e importante atu rekoñese no insentiva dezempeñu di'ak husi nia funsionáriu sira.

Ida ne'e hanesan medida ekuitativa, maski ho karater esepSIONÁL, ne'ebé hakarak atu aproxima funsionáriu sira Estadu nian no traballadór nasional sira seluk, hodi tau sira iha nível ne'ebé hanesan.

2. Dekretu-Lei kona-ba Estatutu Institutu Nasionál Formasaun Dosente no Profisionál sira Edukasaun nian

Diploma ida ne'e regula termu sira kona-ba kriaun, organizaun no funsionamentu Estatutu Institutu Nasionál Formasaun Dosente no Profisionál sira Edukasaun nian (ne'ebé ninia kriaun pevee iha Lei-oan Ministériu Edukasaun nian).

Objetivu Institutu ne'e nian mak hanesan: hatan ba dezafiu rekualifikasaun ba dosente hirak ne'ebé hala'o hela sira nia funsaun, nu'udar buat ne'ebé Estatutu Kareira Dosente nian determina; promove investigasaun ne'ebé nesésáriu atu hadi'a prátika iha óptika formasaun dosente nian, dezenvolve kurikulu husi modalidade formasaun hotu-hotu; no garante kapasidade no efisiénsia iha prestasaun servisu iha teritóriu nasional tomak ba kontinuasaun kualifikasaun kona-ba sistema Edukasaun no Ensinu nu'udar presupostu kona-ba susesu eskolár alunu sira nian.

3. Dekretu-Lei kona-ba Rejime Lisensiamentu Ambientál

Diploma ida ne'e aprova rejime Lisensiamentu Ambientál ne'ebé hatan ba nesésidade pevensaun impaktu negativu ambientál ne'ebé mosu tanba kompleksidade projetu nian, hodi atende ba realidade ekonómika no sosiál Timor-Leste nian.

Sistema ne'e konsebe atribuisaun lisensa ambientál no nia fiskalizaun, ho konsekuénsia lójika ida kona-ba avaliasaun ambientál projetu sira nian, nune'e kria prosedimentu ida ne'ebé integradu no prosesu simplifikadu kona-ba prevensaun impaktu ambientál negativu no kontrolu poluisaun husi projetu sira.

Atu salienta tan katak, paíz hahú kedas iha ninia restarusaun independénsia iha tinan 2002, hatudu preokupasaun boot no hanoín kona-ba kestaun ambientál. Konstituisaun estabesele iha ninia artigu 61.º, la'ós de'it direitu ba moris iha ambiente umanu ida ne'ebé saudável no ho ekolojia ekilibradu, maibé mós, dever atu conserva no proteje ambiente ba jersaun tempu oin mai nian. Ba nível internasionál, Timor-Leste marka ninia prezensa iha Konferénsia oin-oin no ratifika mós Konvensaun Internasionál sira ne'ebé selebra iha Organizasaun Nasoens Unidas kona-ba Alterasaun Klimátika (CQNUAC), Protokolu Kiotu, Konvensaun Nasoens Unidas kona-ba Diversidade Biolójika, Konvensaun Nasoens Unidas ba kombate Dezertifikasaun, Konvensaun Viena ba protesau kamada ozonu no Protokolu Montreal, ba redusaun substánsia ne'ebé hamohu kamada ozonu.

Atu kumpri obrigasaun internasionál ne'ebé hala'o iha CQNUAC, Estadu iha dever atu implementa konjuntu medida estratéjika ida direcionada, atu hatan ba nesiedade ambientál tanba mudansa klimátika iha paíz, hodi propen mós atu hola medida nesésaria sira, hodi hala'o desenvolvimentu sustentável iha Timor-Leste.

Tan ne'e, hanesan responsabilidade ida CQNUAC nian, no nu'udar nasaun ne'ebé hala'o hela desenvolvimentu, Timor-Leste seidak iha vinkulasaun ba redusaun emisaun gás ho efeitu estufa no, tuir data índise, emisaun baixu liu (besik 0,02 tonelada per kapita iha tinan ida), Estadu rasik sei halo ninia redusaun.

Konsellu Ministrus analiza mós:

1. Dekretu-Lei kona-ba kriaun empreza petrolífera Timor-Leste nian

Define tiha ona regulamentu kona-ba atividade ne'ebé iha ligasaun ba setór minarai, Konsellu Ministrus analiza tiha ona mós, proposta kriaun empreza petrolífera Timor-Leste nian, ne'ebé sei detém no jere tuir enkuadramentu ida no prinsípiu natureza empresariál, ba ajente propriedade Estadu Timor-Leste nian iha setór minarai.

2. Dekretu-Lei kona-ba kriaun Fundu Investimentu no Desenvolvimentu

Ho objetivu atu hatan ba difikuldade empresáriu timór oan atu hetan finansiamentu - realidade ekonómika sosiál ida ne'ebé konfirma husi estudu foin lalais ne'e nian kona-ba Korporasaun Finanseira Internasionál

no Banku Aziátiku ba Dezenvolvimentu – Governu Konstitusionál ba Dahaat, hakarak harii Banku Investimentu no Dezenvolvimentu Nasionál.

Prosesu kriaun ba intrumentu finanseiru ida ne'e, hodi fó apoiu ba setór privadu (no fó rezultadu modelu ida ne'ebé sustentável ba dezenvolvimentu Timor-Leste nian) implika atu kumpri konjuntu norma sira nesesáriu ba funsionamentu ida ne'ebé diak ba Banku. Kriaun fundu ida kona-ba investimentu no dezenvolvimentu ne'ebé bele permite, iha kurtu prazu, apoiu ba setór privadu mak hanesan opsaun ida ne'ebé analiza tiha ona husi Konsellu Ministrus.